

Q U Æ S T I O M E D I C A.

Quodlibetariis disputationibus manè discutienda in Scholis Medicorum, die Jovis decimâ-septimâ Novembris.

M. PETRO MARAIS, Doctore Medico, Præside.

Sunt-ne recens inventa prorsus in medendo rejicienda?

I.

RATIONALEM debere esse Medicinam, nemo est quin fateatur: si cui modò non occalluit ea pars animi, in quâ ratio esse dicitur. Neque adeò his temporibus istic inter se congruunt Dogmatici. Alii veterum placitis emancipati, nisi quod ab ipsis profectum est, nihil rectum putant. Alii superstiosè factum id opinantur, & eam sibi laudem esse in animum inducunt maximam, quidquid ab ipsis statutum est, in peiorem partem accipere. Utrunque ea res, quantum quisque potest cogitare commode, magno conatu agitur. Illis quidem si fidem habeas, illustres viros, per quos salutaris ista nobis professio increvit, nihil eorum, quæ ad artem pertinerent, fefellit; ex solis eorum scriptis veræ & ubique efficaces suggeruntur medendi indicationes genuinaque præsidia. Quæ porro est, inquit, ista calliditas, res vetustate robustas calumniando velle pervertere? Quis livor stuporve vera Medicinæ principia negare, inventiunculas verò obtrudere, quæ, tamedî facie ingenii blandiuntur, excusæ nihilominus risum habeant, aut certè ad Medicinam nihil afferant commoditatis? Hi verò contrà opponunt pleraque in Physicis, Anatomicis, Chymicisque inventa, quæ argumenta istæc magnificè magis, ut loquuntur, quàm verè excogitata convellant. Secundum recentiorum hypothesèes tenues quidem, sed evidentes, & à naturæ operibus proximè deductas, quæ nihil in rerum naturâ singant, admittant solummodò ea, quæ aut reverà sint, aut quæ esse possè nemo negaverit, medendi methodum immutandam esse contendunt. Quid enimverò medicina, quàm naturæ imitatio? His in contentionibus, si vis non abstrahere, cave ne in aliteram partem nimis sis vehemens, aut pietate in veteres nimîâ, (quanquam minùs istic peccari potest) aut præpostero recentiorum amore. Minùs quoque audias eos, qui, dum naturam putant incomprehensibilem, ex eorum, qui de ipsâ disputant, discordiâ, istiusmodi controversias, quod è Physicis petitas, tanquam ad artem nequaquam pertineant, imò sapiens medico incommodent, prorsus respuunt. Ex hac re atque ex aliâ pariter in fraudem incides. Sine istos, quoniam ita propositum est, suo modo sapere; at certè arte mederi possè nusquam concesseris. Videat interim quisquis sine ambitione verum scrutatur, numne, si veteri Medicinæ accedant recens inventorum adjumenta, possit ea existere mixtura, unde exurgat elegantior & singularis quædam Medicinæ species.

II.

QUI medicinalem artem subtiliùs excoluerunt, cum animadverterent, nullo artis subsidio, alios morbo licet gravissimo sponte liberari; alios verò, de quibus primò Medicus securus fuerat sub ipsâ curatione de medio tolli, præcipuam in hoc artem esse statuerunt, quæ observaret, quantum providendis ægotantium rebus Natura moliretur.

2

Sic non vagam & temerariam Medicinam, sed Naturæ legibus firmatam esse existimes, cujus imitatione non utendi modò ratio, sed ipsa etiam præcipua remedia deinceps inventa sint. Nimirùm cum intellexissent Medici maximè huic esse solemne in morbis, ubi sui juris est, humorem noxium ita versare, ita suis agitare modis, ut per alvi patentes & constitutos ductus, nullo recidivæ meru, coctum & attemperatum abigat, hinc profectum est, quòd pauca incipientibus morbis tentanda medicamentis esse voluerint; ægrotantibus cibos obtulerint eos, qui neque supervacuâ materiâ naturam plus satis impeditam onerarent, neque adeò debiles, ut ægrotum intereâ fame perderent, sed qui melioris succi minimæque materiæ, humorem contumacem faciliùs tractandum ipsi committerent; hinc quòd minùs confidentes his dimidiatis crisis, quibus natura, vel per sudores, vomitum, perirrhæam consuevit imperfectè morbos judicare, ipsam immisso cæthartico, sicubi ea, quasi muneris oblita sui, cunctaretur, ad germanam purgationem revocaverint. Hinc quòd, si quis in illâ humorum coctione gravior casus incideret aut expectaretur, sanguinis partem effundi siverint, quanto id commodò fieri posset, naturâ monstrante crisis variis, catameniorum hæmorrhoidisque fluxu: postmodum verò ex longinquâ noxiorum utiliumque observatione, ubi ex causâ morbi, affectû partis naturâ, singulari humoris motu, conditione, diversâ ægrotantis corporis affectione, virium robore & imbecillitate, tum varia remedium genera, tum ipsorum adhibendorum opportunitates captaverint, magnam semper Phlebotomiæ & Purgationis rationem habuerint, quæ & abs legitimè medentibus habenda. Horum videlicet præfidiorum eam vim esse quivis in arte exercitatus novit, ut in omnibus morbis ipsa non modò locum habeant, dum securas stabilitas præstant curationes; verùm & convenienti diatrâ conjuncta apud febres continuas, ardentes, internarum partium inflammationes, aliasque id genus acutas affectiones, & chronicas plerasque sic opus omne absolvant, nihil ut tutius excogitari possit, & naturæ nutibus magis accommodum. His præceptis, aliisque ex eodem fonte depromptis stabilita ad nos usque fluxit Medicina, quam verosimile est tam celebrem, tam claram summorum virorum testimoniis nusquam futuram fuisse, nisi omnis ætas illius veritatem & utilitatem esset experta, ut, qui illam novitiæ disciplinæ studiosi contemnunt, nihil ipsis optari pejus possit, quàm ut perveritate suâ fruantur. Quid ergo est? An indistinctâ causâ recentiores condemnandi? minimè sanè; sunt illis sua jura, & fastidiosi foret supercilii, quæ tam probabiliter ab iis disputantur, ne degustata quidem projicere.

III.

QUANTO Medicina, quæ salutem humanæ præsidet, cæteras artes longè pluribus utilitatibus superat; tanto etiam magis, qui in morbis curandis voluerit minis ambigere, (omnes autem velle debent,) accurabit, ut nihil omittat eorum, quibus artis præceptis possit aliqua firmitas accedere. In subsidium adeò nuperas hypothesès vocare minimè erit alienum. Hæ principii evidentibus & experimentis innixæ, quæ sit illa Naturæ æconomia, quam benè curandi ducem Medicina sequitur, veluti oculis subjiciunt. At enim Naturæ nomine cuncta licet providentis, interdum tamen aberrantis, morbo tandem victæ, & superatæ, aliud nihil intelligendum esse videatur, quàm ea solidorum fluidorumque coaptatio Divinæque Mechanicæ, quæ corporis humani fabricationem inculpatam tueatur, molestiisque arceat, quoad ejus patiuntur & ipsa contextûs ratio, & varia, inter quæ collocatur, corpora: quorum quidem vitia gravioresque casus vidit, sed cohibere minimè voluit Is, qui operibus suis, quem maximè decebat, novit finem imponere. Scilicet quandiu fibrarum, quibus viscera constant, ea est firmitas, quæ, pro suâ cuiusque conformatione pororumque structura, quidquid sibi alienum est, vel respuat, vel contractione suâ abigat: quandiu sanguis eam habet intestinam principiorum concitationem, quæ, si quid peregrinum est, moliatur secernere, in eas partes post modum circuitûs ope impel-

lendum, quarum naturalis compages admittit; tunc, nullâ assidente intelligentiâ, qualis vulgò Natura fingitur, ipse suâ valetudine liberatur ægrotus. Artis ope indiget, si quid horum conturbatur. Ipsi adeò id muneris maximè esse videtur, ut promoveat eam in sanguine concitationem, & si quæ alia ipsi adversatur, contineat; sicuti quædam prohibent, vel corrumpunt circularem ejus motum, amoveat; fibris item viscerum consulat, ne noxiorum inani pondere obrui se pariantur. Hæc præstat si minùs in omnibus morbis, in plerisque saltem, in cæteris inchoat triplici suo illustri præsidio casta & germana Medicina. Phlebotomia quidem hæc sunt dotes, ut vel fracto humorum impetu, si quid viscerum fibras decumbenti humori impares frangere minabatur, à venis resorbeatur; vel detracto sanguine, qui superstes est, contractione arteriarum robustiori faciliùs circuletur; inde si quid in ipso spissius, dissolvitur; si quis itioni obex, propellitur; si quid minoribus in vasibus hætebat, sanguini præter labenti datur diluendum, tandèmq; ne plura addam, adjuvatur excrementitiarum partium secretio. Nec in hos usus minùs valet Purgatio. Cathartico- rum enim nomine quæ propriè circumferuntur, vasorum oscula, quæ plurima in ventriculo reperiuntur, cum venas lacteas dum subeunt sanguiniquæ admiscuntur, sic ipsum, aliòsq; ad quos circuitus auxilio perveniunt, succos eommovent, ut quod crassum non potuit per tenues carniùm, vel renum tubulos, aut alio quovis minùs perfectò modo vacuari, tandem hac fermentatione secretum, præ gravitate suâ meatibusque faventibus in glandulis intestinorum percoletur; sic sordibus suis repurgatus sanguis laudabiles succos aut ad nutritionem, aut ad alias quasvis actiones perficiendas secernit: viscera nihil metunt à pondere & qualitate humorum, & longa vitæ spes relinquunt. Jam verò Diæta ex cibis euechymis petita, sorbilis, sales & sulphura à quibus sanguinis & humorum dysestasia, diluit, temperat, per cutis spiracula reliqua deducit, obstructions adeò releat, nimiam fermentationem prohibet, verbo dicam, præsidii utriusque actionem promovet adjuvanteque. Quisquis hæc mente à præjudiciis liberâ perpenderit, & secum voluerit experiri quàm bellè sanæ artis Theorematis cum istâ philosophandi ratione conveniat, non inanem prorsus esse Medicinæ recens inventorum operam intelligat.

IV.

UT ut nupera inventa non mediocriter Medicinam illustrent, qui istis plus satis moventur, nihilominus sunt monendi, quàm hæc comparata pulcrè sint ad perniciem, si ultra debitum admittantur. Fac enim, quod multis aridet, pleræque oriantur insignes acutæque ægritudines ab acido humore, qui dum sanguinem ex parte cogit, naturalem, quo spiritus humoris partes exagitat, motum ipsius interturbet, vel succo nerveo, si quis modò est, admissus, spirituum animalium irradiationem cohibeat, vel vitiet; quisquàm ne tam impunè de corio humano luserit, ut, relicta epaphæresi, noxiorum humorum præparatione & purgantium medicamentorum administratione, una hunc sollicitudo occupet, qui possit acidum morbi causam jugulare; à Chymicis scilicet edoctum, acida suis, quæ vocant, alkalibus domari & intercipi? Qui ita se gerit, medicinæ fores nedùm pulsasse videatur. Optandum sanè rem ita se habere posse; medico, nullâ exquisitiori methodo ægrotum ad sanitatem citò & commodè perducturo, quod absurdissimum & ratione simul & sensu ipso convellitur. Præsidiorum enim istorum efficacitatem quàm facilè mille res in corporibus valent conturbare! si quas attingunt partes, si quæ permeant vasa, magnam inde virtutis partem, ex succorum, quos singulæ partes sibi habent proprios, admixtione, minui necesse est. Neque verò, quoniam electione nullâ utuntur mortua medicamenta, illum, cui dicata sunt, hostem, valent internoscere. In vasculis quidem suis artifices sic norunt sales salubres, liquores liquoribus committere, ut quem quærunt, nullo interea periculo, habeant exitum; isti neque impunè peccatur, (sumit enim vires morbus, & quæ stat in præcipiti, medendi occasio labitur;) neque eadem, quæ extrâ contingunt, in morborum curatioribus securè expectaveris. Veluti pleraque diversâ ratione, quàm aperto aëre, in factitiò & Machinâ

Pneumatica fieri animadvertis; quod cuiusque corporis vires maxime à corporum, quibus circumcingitur, vicinia oriuntur; sic pluribus reprehensionibus obnoxia quæ volueris ejusmodi in usus medicos afferre, videas, magno ægotantium damno, non respondere. Hinc cum sanguinem ex arteria animalis cuiuspiam, in alterius venam indeque in totum corpus transfundi posse nemo negaverit, nisi cui ejusdem circuitus lateret rem tam periculi plenissimam esse eventus probavit, ratio demonstrat. Excute alia, quæ usui venere ambitosæ novitati temedia ex suis hypothesibus; comperies ista, dum compendio vacant, eodem minoris securitatis vitio laborare.

V.

MINIME ergo sufficit, quempiam hypothesibus nuperisque inventis instructum ad artem medicam accedere. Planè istæ, scitu quanquam dignissima, & quæ artificis ingenium excitent, ignorare Medicum, meo quidem judicio, præstiterit, quam nescire, ea quam sint pestifera, & quam nihil ad medicos usus efficacia, nisi si ad vulgarem medendi methodum exigantur, & acri mentis acie temperentur, quæ, quid ex iis boni, quid mali consequatur, prospiciat. Absit autem ut gravissimo Medici nomine dignemur eos, qui præ cæteris multum sapere arbitrantur, si à veteribus quæ bene, quæ male dissentiant. His, si quid omiserint, plurimam laudem nihilominus habituris, venia tribuenda est. Sub Medicinæ incunabula, necessariis cum abundè premerentur, nihil mirum, si, relictis iis, quæ diuturnioris temporis industriam postularent, ad ea se se converterint, quæ evidentes afferrent commoditates. Quæ porro ars statim fuit? quid non usu nitescit? Plura fuerint posterioribus sæculis reperta, esto sanè: quasi, senescente mundo, ab hominibus, qui plura quotidie experiuntur, major scientia non sit expectanda. Verùm quam à prioribus Medicis accepimus curandi rationem continuo si rejicias, vide ne dum solemnem viam deseris per sentes & impedita itinera tibi sit ingrediendum. Errant videlicet, qui parum ipsos in Medicinâ vidisse calumniantur. Artem inconcussis certisque dogmatis constituerunt, quibus jam tûm steter, in ulterius ævum duratura. Fatendum tamen quod res est: neque nihil quoque viderunt neoterici. Medicina, quæ absque naturæ indagatione debilis est & manca, quemadmodum sub primis sapientiæ professoribus adolevit, ita sanguinem vitæque semper fecisse visa est, ut majori studio naturæ scientia agitari cœpit: hac verò plurimum laude nostra ætas abundat. Ex eo fonte plurima haurire liceat Medico, quorum quidem operâ in persolvendis curationibus non mediocriter rectè facti conscientiam sustentari se sentiat; quatenus is, eo nomine, quantum in hac corporum varietate, morborum complexione rectumque caligine humana permittit imbecillitas, & ægritudinis species certius dignoscere noverit; item, quæ in singulis morbis aut spe consolentur, aut metu terreat æstigare; & ubi ad curationem ventum est, quæ causâ auxilii reperta sunt, tutius adhibere.

Ergo recens inventa non sunt prorsus in medendo rejicienda.

DOMINI DOCTORES DISPUTATURI.

M. Nicolaus Brunel De la Carlière.

M. Michaël Pichonnat.

M. Philippus Mathon.

M. Ioannes-Baptista Doye.

M. Franciscus Picoté de Belleître.

M. Petrus Lombart.

M. Urbanus Leaulé.

M. Nicolaus Bailly.

M. Ludovicus Merin.

Proponebat Lutetiæ PETRUS-JOHANNES BURETTE,
Parisiensis Baccalaureus Medicus. A. R. S. H. 1689.

Apud Franc. Muguet, Regis & Facultatis Medicinæ Typographum.